

Tabell C-k

Saker med særskild fordeling for kommunane 2020

Følgjande saker er gitt ei særskild fordeling innanfor innbyggjartilskotet i 2020:

Kol.	Sak	Beløp i 1000 kr
1	Inndelingstilskot	1 383 875
2	Trekk Nannestad og Ullensaker	-19 350
3	Helsestasjons- og skulehelseteneste	904 578
4	Korreksjon kommunal medfinansiering statleg barnevern	-29 776
5	Forsøk med ny oppgåve- og ansvarsdeling i barnevernet	57 427
6	Uttrekk forsøk statleg finansiering omsorgstenestene	-999 623
7	Overføring av ansvar for AC Møller skule	3 958
8	Kompensasjon for endringar i regelverket for eigedomsskatt	143 000
9	Innlemming av tilskot til auka lærartettleik	1 316 832
10	Frivilligsentralar	200 202
11	<i>SUM</i>	<i>2 961 122</i>

Kolonne 1 – Inndelingstilskot

Inndelingstilskotet er ei kompensasjonsordning for kommunar som slår seg saman og skal kompensere kommunane for ein reduksjon i rammetilskotet som følgje av samanslutninga. Inndelingstilskotet kompenserer for bortfall av basistilskot og ein eventuell nedgang i distriktstilskot. To kommunar som har slått seg saman vil få eit basistilskot på same måte som andre kommunar i utgiftsutjamninga, mot to basistilskot før samanslåinga. Den samanslåtte kommunen blir difor kompensert gjennom inndelingstilskotet for bortfall av eit basistilskot. Dersom ein samanslått kommune får mindre i distriktstilskot enn kommunane ville fått kvar for seg, blir kommunen gjennom inndelingstilskotet kompensert for differansen mellom det den samanslåtte kommunen får og det dei ville fått kvar for seg.

Inndelingstilskotet blir gjeve frå det året samanslåinga trer i kraft. Kommunene får fullt tilskot i 15 år, før det deretter blir trappa gradvis ned over fem år. For kommunar som slo seg saman i perioden 2014–2017 (kommunereforma) blir inndelingstilskotet rekna ut frå gjeldande inntektssystem i 2016.

I 2020 får 53 kommunar inndelingstilskot. 43 nye samanslåingar får inndelingstilskot ut frå inntektssystemet i 2016. For kommunar som blir delte er inndelingstilskotet fordelt til dei kommunane dei blir slått saman med ut frå andelen innbyggjarar som blir overført (innbyggjartal per 1. januar 2019).

Inndelingstilskotet til Re kommune (nye Tønsberg) er redusert til 20 pst. av fullt tilskot, mens inndelingstilskotet til Bodø kommune er redusert til 80 pst. av fullt tilskot, som følgje av nedtrapping av tilskotet.

Alle beløp er prisjustert.

Kolonne 2 – Trekk Nannestad og Ullensaker

Nannestad og Ullensaker har i perioden 1993–2008 motteke finansieringsbistand i form av skjønsmidlar i samband med etableringa av Oslo Lufthamn, Gardermoen. Totalt har

kommunane motteke 735,5 mill. kroner, der 387 mill. kroner skal betalast tilbake i 20 like store avdrag frå og med 2009. Dette blir gjort ved eit trekk i rammetilskotet til Nannestad og Ullensaker på høvesvis 7,43 og 11,92 mill. kroner årleg t.o.m. 2028. Trekket blir ikkje prisjustert.

Kolonne 3 – Helsestasjons- og skulehelseteneste

Regjeringa har styrkja helsestasjons- og skulehelsetenesta, inkludert jordmortenesta. Sidan 2014 er det løyvd midlar til helsestasjons- og skulehelsetenesta via rammetilskotet. For 2020 er beløpet prisjustert, og utgjer til saman 904,6 mill. kroner. Midlane er føreslått fordelt til kommunane basert på talet på innbyggjarar i alderen 0–19 år, med eit minstenivå på 100 000 kroner per kommune.

Kolonne 4 – Korreksjon barnevern, uttrekk Oslo kommune

I 2015 blei det lagt inn 160 mill. kroner i rammetilskotet som følgje av auka kommunal medfinansiering av det statlege barnevernet. Denne endringa gjaldt ikkje Oslo kommune, som òg har ansvaret for den statlege delen av barnevernet i Oslo.

Sidan det ikkje er mogleg å halde Oslo utanfor fordelinga av midlane, fekk Oslo om lag 26 mill. kroner gjennom kostnadsnøkkelen til dette føremålet i 2015. For at Oslo skal gå i null blei det lagt inn ein korreksjon på -26,012 mill. kroner i tabell C i 2015. Trekket for 2020 er prisjustert.

Kolonne 5 – Forsøk med ny oppgåve- og ansvarsdeling i barnevernet

Barne- og likestillingsdepartementet sette i 2016 verk eit forsøk med auka kommunalt ansvar for barnevern i (noverande) Færder, Alta og Røyken. Rammetilskotet vart auka for å kompensere dei tre kommunane for auka utgifter til barnevernet. Alta og Færder har fått innvilga søknad om å vidareføre forsøksverksemda t.o.m. 31. desember 2021. Forsøksverksemda i Røyken blir som planlagt avvikla ved utgangen av 2019. For Alta og Færder er beløpet prisjustert frå 2019.

Kolonne 6 – Forsøk med statleg finansiering av omsorgstenestene

Forsøk med statleg finansiering av omsorgstenestene blei sett i verk 1. mai 2016 og blir administrert av Helse- og omsorgsdepartementet. Forsøket blir i hovudsak finansiert ved at midler blir trekte ut av forsøkskommunane sitt innbyggjartilskot og overførte til kap. 761, post 65 på Helse- og omsorgsdepartementet sitt budsjett. Forsøket skal vidareførast og blir utvida ved at dagens deltakerkommunar og kommunar desse slår seg saman med, fortset i forsøket frå 1. januar 2020/1. juli 2020. For nærare omtale av forsøket sjå Prop.1 S (2019–2020) for Helse- og omsorgsdepartementet.

Kolonne 7 – Overføring av A. C. Møller skule frå Statped til Trondheim kommune

Ansvaret for drifta av A. C. Møller skule blei overført frå Statped til Trondheim kommune frå 1. juli 2017. Frå hausten blir Trondheim kommune kompensert over rammetilskotet. For statsbudsjettet for 2020 og 2021 blir heilårsverknad av overføringa føreslått kompensert med ein auke i rammetilskotet. Effekten i 2020 er på 2,3 mill. kroner. Midlane vil i 2020 og 2021 bli fordelt særskild til Trondheim kommune. Frå og med 2022 vil midlane bli fordelte etter dei ordinære kriteri i inntektssystemet. I 2020 vil kommunen motta 3,958 mill. kroner.

Kolonne 8 – Kompensasjon for endringar i regelverket for eigedomsskatt

I statsbudsjettet for 2019 blei det satt av 71 mill. kroner til å kompensere kommunar som får reduserte inntekter som følgje av at dei ikkje lenger kan krevje inn eigedomsskatt på produksjonsutstyr og -installasjonar. I 2019 var kompensasjonen ein del av skjønstilskotet. I 2020 er kompensasjonen auka til 143 mill. kroner, og flytta over til innbyggjartilskotet (tabell C).

Kompensasjonen blir berekna på grunnlag av kommunane si rapportering av skattegrunnlaget for dei aktuelle eigedomane for 2018 og 2019, kopla med skattesatsen som kommunane har rapportert inn til KOSTRA. Kommunane er kompenserte fullt ut utover ein gitt eigendel per innbyggjar av det berekna inntektsbortfallet i 2020. Eigendelen i 2020 er om lag 32 kroner per innbyggjar.

Kolonne 9 – Innlemming av tilskot til auka lærartettleik

Som varsla i Prop. 1 S (2018–2019) blir midlar til tidleg innsats i skulen gjennom auka lærartettleik på 1.–10. trinn innlemma i rammetilskotet i 2020. Det blir overført 1 316,8 mill. kroner frå kap. 226 post 63. Midlane blir i 2020 fordelt særskild (tabell c) for å ivareta både kommunar med eit relativt og med eit absolutt behov for lærarårsverk. Frå 2021 vil midlane bli fordelt etter dei ordinære kriteria i inntektssystemet.

Kolonne 10 – Tilskot til frivilligsentralar

Tilskot til frivilligsentralar vart innlemma i rammetilskotet til kommunane i 2017. I 2020 blir beløpet frå 2019 prisjustert. I tillegg vil ytterlegare 7,0 mill. kroner bli fordelt til dette føremålet i 2020, ut ifrå etablering av 17 nye sentralar. Tilskot til frivilligsentralar blir fordelt etter ordinære kriterium frå 2021.

Kolonne 11 – Sum saker med særskild fordeling

Summen av kolonnane 1–10. Talet er nytta i tabell 2-k, kolonne 3. Tilskota er lagde inn i inntektssystemet og er i hovudsak haldne utanfor utrekninga av inntektsgarantiordninga.